



CONCELLO DE VIGO  
Secretaría de Goberno Local

**D<sup>a</sup>. PATRICIA RODRIGUEZ CALVIÑO, CONCELEIRA-SECRETARIA DA XUNTA DE GOBERNO LOCAL DO CONCELLO DE VIGO**

**C E R T I F I C O:** Que a Xunta de Goberno Local, na sesión ordinaria do **24 de xullo de 2026**, adoptou o seguinte acordo:

**13.- PROPOSTA PARA A APERTURA DO TRÁMITE DE CONSULTA PÚBLICA PREVIA Á ELABORACIÓN DA ORDENANZA MUNICIPAL ABOLICIONISTA DA PROSTITUCIÓN E CONTRA TODO TIPO DE EXPLOTACIÓN SEXUAL. EXPTE. 14712/224.**

Sométese a aprobación o informe-proposta de data 21/07/2026, asinado pola xefa de Igualdade e a asesora xurídica de Igualdade, e conformado pola concelleira-delegada e a concelleira da Área de Goberno, que di o seguinte:

**ANTECEDENTES**

**Primeiro.-** Con data 15 de xullo de 2026, mediante decreto ditado no exercicio das competencias atribuídas pola normativa de réxime local e polas resolucións e acordos de delegación de competencias vixentes, a concelleira da Área de Goberno de Patrimonio Histórico, Cultura e Igualdade acordou iniciar a tramitación da **Ordenanza municipal abolicionista da prostitución e contra todo tipo de explotación sexual para o Concello de Vigo**, coa finalidade de establecer un marco municipal de actuación nesta materia dentro do ámbito competencial da entidade local. A resolución de inicio fundamenta a oportunidade da iniciativa normativa na necesidade de dotar ao Concello de Vigo dun instrumento regulamentario que permita orientar a actuación municipal fronte á prostitución e ás distintas formas de explotación sexual, mediante o exercicio das competencias municipais en materia de igualdade, servizos sociais, convivencia cidadá, seguridade e utilización dos espazos públicos.

**Segundo.-** En execución do referido decreto elaborouse a documentación preparatoria necesaria para esta primeira fase da iniciativa regulamentaria, incorporándose ao expediente o documento destinado á realización da consulta pública previa prevista no artigo 133 da Lei 39/2015, do 1 de outubro, do procedemento administrativo común das administracións públicas. A citada documentación incorpora a xustificación da iniciativa normativa, a análise da súa necesidade e oportunidade, a definición dos obxectivos perseguidos, a súa adecuación aos principios de boa regulación previstos no artigo 129 da citada Lei e os aspectos que deberán someterse á consideración da cidadanía durante o trámite de participación pública.

**Terceiro.-** Unha vez incorporada ao expediente a documentación correspondente a esta fase inicial da tramitación, procede elevar á Xunta de Goberno Local a proposta de apertura da consulta pública previa, como actuación preparatoria para a posterior elaboración do proxecto de ordenanza municipal.

**MARCO NORMATIVO E ESTRATÉXICO DE REFERENCIA**

Resultan de aplicación ao presente expediente, entre outras, as seguintes disposicións:



## 1. Normativa internacional e europea

- O Convenio das Nacións Unidas para a Represión da Trata de Persoas e da Explotación da Prostitución Allea, do 2 de decembro de 1949.
- A Convención das Nacións Unidas contra a Delincuencia Organizada Transnacional, do 15 de novembro de 2000 (Convención de Palermo) complementada polo Protocolo para prever, reprimir e sancionar a trata de persoas, especialmente mulleres e nenos e nenas (Protocolo de Palermo).
- O Convenio do Consello de Europa sobre a loita contra a trata de seres humanos, do 16 de maio de 2005 (Convenio de Varsovia).
- O Convenio do Consello de Europa sobre prevención e loita contra a violencia contra a muller e a violencia doméstica, do 11 de maio de 2011 (Convenio de Istambul).
- A Resolución do Parlamento Europeo do 2 de febreiro de 2006 sobre a situación actual na loita contra a violencia exercida contra as mulleres e futuras accións.
- A Resolución 61/144 da Asemblea Xeral das Nacións Unidas, sobre a trata de mulleres e nenas, aprobada o 19 de decembro de 2006 e publicada o 1 de febreiro de 2007.

## 2. Normativa constitucional

- A Constitución española, especialmente os artigos 9.2, 14, 103 e 137.

## 3. Normativa básica estatal de réxime local e procedemento administrativo

- A Lei 7/1985, do 2 de abril, reguladora das bases do réxime local.
- O Real decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das entidades locais, naquilo que resulte de aplicación.
- A Lei orgánica 2/1986, do 13 de marzo, de forzas e corpos de seguridade, no seu artigo 1.3, establece que *“as Corporacións Locais participarán no mantemento da seguridade pública nos termos establecidos na Lei reguladora das bases do réxime local e no marco desta lei”*, xunto co artigo 53 da mesma Lei, que dispón que os Corpos da Policía Local deberán exercer funcións de Policía Administrativa *“no relativo ás Ordenanzas, Bandos e demais disposicións dentro do ámbito da súa competencia”*.
- A Lei 39/2015, do 1 de outubro, do procedemento administrativo común das administracións públicas, en particular os artigos 128, 129 e 133.
- A Lei 40/2015, do 1 de outubro, de réxime xurídico do sector público.
- A Lei 19/2013, do 9 de decembro, de transparencia, acceso á información pública e bo goberno, que establece os principios de transparencia na actuación das administracións públicas e garante o dereito de acceso á información pública.
- A Lei 1/2016, do 18 de xaneiro, de transparencia e bo goberno de Galicia, que reforza no ámbito da Comunidade Autónoma de Galicia os principios de publicidade activa, transparencia e participación cidadá na actuación das administracións públicas.

## 4. Normativa estatal en materia de igualdade, violencia de xénero e liberdade sexual

- A Lei orgánica 3/2007, do 22 de marzo, para a igualdade efectiva de mulleres e homes, que impón aos poderes públicos a adopción de medidas e accións positivas para acadar a igualdade real e efectiva entre mulleres e homes.





CONCELLO DE VIGO  
Secretaría de Goberno Local

- A Lei orgánica 1/2004, do 28 de decembro, de medidas de protección integral contra a violencia de xénero.
- A Lei orgánica 10/2022, do 6 de setembro, de garantía integral da liberdade sexual, cuxo artigo 3 considera a trata con fins de explotación sexual unha forma de violencia sexual e cuxo artigo 35 insta ás administracións públicas a promover o dereito á asistencia integral especializada e accesible mediante a dispoñibilidade dos servizos de recuperación integral e servizos de atención a vítimas de trata e explotación sexual.
- A Lei 4/2015, do 27 de abril, do Estatuto da vítima do delito, que recoñece ás vítimas os dereitos de información, protección, apoio, asistencia e participación, con especial atención ás vítimas especialmente vulnerables, e o Real decreto 1109/2015, do 11 de decembro, polo que se desenvolve a citada lei.

## 5. Normativa autonómica

- A Lei 5/1997, do 22 de xullo, de Administración local de Galicia.
- A Lei 11/2007, do 27 de xullo, galega para a prevención e o tratamento integral da violencia de xénero, na súa redacción vixente, recoñece no seu artigo 3 a violencia sexual, a trata con fins de explotación sexual e a explotación sexual como formas de violencia de xénero.

## 6. Instrumentos estratéxicos

- As conclusións da Comisión Mixta dos Dereitos da Muller e da Igualdade de Oportunidades do Congreso das Deputadas e Deputados e do Senado, aprobadas o 13 de marzo de 2007, derivadas do Informe da Ponencia sobre a situación actual da prostitución no noso país, nas que se recomenda impulsar políticas públicas orientadas á prevención da explotación sexual, á protección integral das mulleres en situación de prostitución e á loita contra a trata de seres humanos con fins de explotación sexual.
- O Pacto de Estado contra a Violencia de Xénero, aprobado polo Congreso das Deputadas e Deputados o 28 de setembro de 2017 e renovado o 26 de febreiro de 2025, que establece no seu eixo 2 a medida 144: *Garantizar el enfoque interseccional en cualquier política, medida y respuesta institucional que se adopte para combatir la violencia contra las mujeres en todas sus formas, teniendo en cuenta las diferentes vulnerabilidades y circunstancias de las víctimas: (entre otras) mujeres en contextos de prostitución; de forma que se garantice su pleno acceso y ejercicio efectivo de derechos. Implementar o adaptar los recursos especializados a las necesidades y condiciones de dichas mujeres, para hacerlos plenamente accesibles e inclusivos para ellas (...).* Medida 345: *Garantizar que las mujeres en contextos de prostitución reciban información sobre violencia contra las mujeres y sobre los recursos existentes que les faciliten alternativas a la prostitución.*
- O V Plan Integral de Igualdade de Oportunidades entre Mulleres e Homes da cidade de Vigo 2026-2030, aprobado pola Xunta de Goberno Local o 6 de febreiro de 2026 e ratificado polo Pleno da Corporación Municipal o 23 de febreiro de 2026, que incorpora a liña de traballo **"Cidade abolicionista da prostitución"**, na que destacan, entre outros, os seguintes obxectivos e medidas:
  - Obxectivo 36: *Reforzar a intervención social para evitar a explotación sexual ou unha situación de prostitución.*



- Obxectivo 56: *Impulsar un Plan contra a Trata e a Explotación Sexual e pola Abolición da Prostitución.*
- Medida 5.24: *Priorizar o acceso das mulleres en situación ou risco de explotación sexual nos programas de apoio social, co fin de previr a exclusión, a soidade e a falta de atención como factores de risco da explotación sexual.*
- Medida 8.22: *Impulsar un Plan contra a Trata e a Explotación Sexual pola Abolición da Prostitución que, entre outras accións, contemplará as seguintes medidas: Desenvolver accións para a atención integral a mulleres prostituídas e outras formas de explotación sexual.*

### **CONSIDERACIÓNS XURÍDICAS**

#### **Primeira.- Potestade regulamentaria e procedemento de elaboración da ordenanza.**

O artigo 4.1 da Lei 7/1985, do 2 de abril, reguladora das bases de réxime local, o artigo 4 do Real Decreto 2568/1986, do 28 de novembro, que aproba o Regulamento de organización, funcionamento e réxime xurídico das entidades locais e o artigo 6.1 da Lei 5/1997, do 22 de xullo, de Administración Local de Galicia, atribúen a potestade regulamentaria aos municipios. Por outra banda, o artigo 128 da Lei 39/2015, do 1 de outubro, de procedemento administrativo común das administracións públicas recoñece a potestade regulamentaria aos órganos de goberno locais.

En consecuencia, a iniciativa para a elaboración da Ordenanza municipal abolicionista da prostitución e contra todo tipo de explotación sexual desenvólvese no exercicio da potestade regulamentaria que o ordenamento xurídico atribúe ao Concello de Vigo para a regulación das materias comprendidas dentro das súas competencias propias.

#### **Segunda.- Necesidade e oportunidade da iniciativa normativa.**

A realidade da prostitución e das distintas formas de explotación sexual constitúe un fenómeno complexo estreitamente vinculado ás desigualdades estruturais entre mulleres e homes, ás situacións de vulnerabilidade social e económica e á existencia dunha demanda sostida de servizos sexuais.

Así mesmo, aparece frecuentemente asociada a situacións de pobreza, exclusión social, precariedade laboral, desigualdade de xénero, procesos migratorios e outras circunstancias de especial vulnerabilidade, así como á trata de seres humanos con fins de explotación sexual e a outras manifestacións de violencia exercida contra as mulleres.

Desde unha perspectiva de dereitos humanos e de igualdade efectiva entre mulleres e homes, diferentes organismos nacionais e internacionais teñen posto de manifesto a necesidade de impulsar políticas públicas dirixidas á prevención da explotación sexual, á protección das persoas en situación de prostitución e á actuación sobre os factores estruturais que favorecen a súa persistencia.

Neste contexto, as entidades locais, pola súa proximidade á cidadanía e polo exercicio das súas competencias en materia de igualdade, servizos sociais, convivencia cidadá, seguridade e utilización do espazo público, poden desenvolver actuacións orientadas á prevención das situacións de explotación sexual, á protección das persoas en situación de vulnerabilidade, á sensibilización social e á coordinación das políticas municipais nesta materia.

En consecuencia, considérase oportuno dotar ao Concello de Vigo dun instrumento regulamentario que estableza un marco municipal de actuación fronte á prostitución e contra todo tipo de explotación sexual dentro do ámbito das competencias municipais, permitindo orientar e





CONCELLO DE VIGO  
Secretaría de Goberno Local

coordinar a actuación dos distintos servizos municipais e desenvolver as políticas públicas correspondentes de maneira estable, coherente e conforme ao ordenamento xurídico.

**Terceira.- Obxecto da iniciativa normativa e adecuación aos principios de boa regulación.**

A futura Ordenanza municipal abolicionista da prostitución e contra todo tipo de explotación sexual para o Concello de Vigo ten por finalidade establecer un marco municipal de actuación fronte á prostitución e outras formas de explotación sexual, dentro do ámbito das competencias propias da entidade local, orientado á promoción dunha sociedade máis igualitaria e libre de violencia contra as mulleres, mediante a adopción de medidas orientadas á prevención da explotación sexual, á sensibilización social, á protección das persoas en situación de prostitución e á promoción de políticas municipais de sensibilización, información, coordinación institucional e intervención social.

O fin último é promover, dentro do ámbito das competencias municipais, a erradicación da prostitución e outras formas de explotación sexual no municipio de Vigo co obxectivo de protexer os dereitos das vítimas do sistema prostitucional.

A iniciativa normativa pretende dotar o Concello de Vigo dun instrumento regulamentario que permita ordenar e coordinar a actuación municipal nesta materia, facilitando o exercicio das competencias municipais de acordo co marco constitucional, legal e competencial vixente, sen invadir as competencias atribuídas ás restantes administracións públicas.

De conformidade co disposto no artigo 129 da Lei 39/2015, do 1 de outubro, a iniciativa normativa adecúase aos principios de boa regulación polos seguintes motivos:

**a) Principio de necesidade e eficacia.**

A regulación proxectada responde á necesidade de establecer un marco municipal de actuación fronte á prostitución e outras formas de explotación sexual no exercicio das competencias municipais, configurándose a aprobación dunha ordenanza como o instrumento máis adecuado para alcanzar a finalidade perseguida.

**b) Principio de proporcionalidade.**

A futura ordenanza limitarase a regular aquelas actuacións comprendidas dentro do ámbito competencial do Concello de Vigo, incorporando exclusivamente aquelas medidas que resulten necesarias para a consecución dos seus obxectivos.

**c) Principio de seguridade xurídica.**

A iniciativa intégrase de maneira coherente no conxunto do ordenamento xurídico, respectando o sistema de distribución competencial entre as distintas administracións públicas e garantindo a súa compatibilidade coa normativa estatal, autonómica e internacional aplicable.

Así mesmo, a futura ordenanza contribuirá a dotar de maior claridade, estabilidade e previsibilidade a actuación municipal nesta materia.

**d) Principio de transparencia.**

A iniciativa normativa sométese á consulta pública previa prevista no artigo 133 da Lei 39/2015, posibilitando a participación da cidadanía e das organizacións recoñecidas por lei que agrupen ou



representen as persoas cuxos dereitos ou intereses lexítimos se viran afectadas pola futura norma e cuxos fines garden relación directa co seu obxecto.

Posteriormente, observaranse igualmente os restantes trámites de publicidade e participación cidadá legalmente previstos durante a tramitación da disposición de carácter xeral.

#### **e) Principio de eficiencia.**

A regulación proxectada pretende favorecer unha actuación coordinada dos distintos servizos municipais, sen introducir cargas administrativas innecesarias nin obrigas accesorias alleas aos fins de interese xeral perseguidos pola iniciativa normativa.

#### **Cuarta.- Consulta pública previa.**

O artigo 133.1 da Lei 39/2015, do 1 de outubro, establece que, con carácter previo á elaboración do proxecto ou anteproxecto de lei ou de regulamento, deberá realizarse unha consulta pública a través do portal web da Administración competente, coa finalidade de recoller a opinión da cidadanía e das organizacións máis representativas potencialmente afectadas pola futura norma acerca dos problemas que se pretenden solucionar coa iniciativa, a necesidade e oportunidade da súa aprobación, os obxectivos da futura norma e as posibles solucións alternativas regulatorias e non regulatorias.

Este trámite constitúe unha manifestación do principio de transparencia no exercicio da potestade regulamentaria e ten por finalidade favorecer a participación cidadá desde o inicio do procedemento de elaboración da disposición de carácter xeral.

En consecuencia, procede acordar a apertura do correspondente trámite de consulta pública previa mediante a publicación da documentación na sede electrónica municipal, durante o prazo legalmente establecido, para que a cidadanía e as organizacións potencialmente afectadas poidan formular as observacións e achegas que consideren oportunas.

#### **Quinta.- Competencia.**

De conformidade co disposto no artigo 127.1.a) da Lei 7/1985, de 2 de abril, de bases de réxime local, correspóndelle á Xunta de Goberno Local a competencia para a aprobación dos proxectos de ordenanzas e regulamentos no ámbito dos municipios de gran poboación. Así mesmo, en aplicación do réxime organizativo municipal vixente, fórmulase á Xunta de Goberno Local a seguinte

#### **PROPOSTA DE ACORDO:**

**“Primeiro.-** Aprobar a apertura do trámite de consulta pública previa para a elaboración da Ordenanza municipal abolicionista da prostitución e contra todo tipo de explotación sexual para o Concello de Vigo, previsto no artigo 133 da Lei 39/2015, do 1 de outubro, do procedemento administrativo común das administracións públicas, mediante a súa publicación no enderezo <https://consulta.vigo.org> durante un prazo de vinte (20) días hábiles, co fin de que a cidadanía e as organizacións e asociacións que así o consideren, poidan facer chegar as súas opinións acerca dos aspectos recollidos no Anexo I que acompaña o presente acordo.

**Segundo.-** Trasladar o presente acordo ao Servizo de Administración Electrónica para a apertura do correspondente trámite de consulta pública previa na sede electrónica municipal.





**CONCELLO DE VIGO**  
Secretaría de Goberno Local

**Terceiro.-** Publicar o presente acordo na sede electrónica municipal, na intranet corporativa e no Portal de Transparencia do Concello de Vigo”.

**ACORDO**

A Xunta de Goberno local aproba a proposta contida no precedente informe.

**ANEXO I**

**CONSULTA PÚBLICA PREVIA PARA A ELABORACIÓN DA ORDENANZA MUNICIPAL ABOLICIONISTA DA PROSTITUCIÓN E CONTRA TODO TIPO DE EXPLOTACIÓN SEXUAL PARA O CONCELLO DE VIGO**

De conformidade co disposto no artigo 133 da Lei 39/2015, do 1 de outubro, do procedemento administrativo común das administracións públicas, sométese a consulta pública previa á iniciativa para a elaboración da Ordenanza municipal abolicionista da prostitución e contra todo tipo de explotación sexual para o Concello de Vigo, co fin de recoller a opinión da cidadanía e das asociacións e organizacións interesadas respecto dos seguintes aspectos:

|                                                     |                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                          |
|-----------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| Problemas que se pretenden solucionar coa normativa | <p>A realidade da prostitución e das distintas formas de explotación sexual constitúe un fenómeno complexo estreitamente vinculado ás desigualdades estruturais entre mulleres e homes, ás situacións de vulnerabilidade social e económica e á existencia dunha demanda sostida de servizos sexuais.</p> <p>Así mesmo, aparece frecuentemente asociada a situacións de pobreza, exclusión social, precariedade laboral, desigualdade de xénero, procesos migratorios e outras circunstancias de especial vulnerabilidade, así como á trata de seres humanos con fins de explotación sexual e a outras manifestacións da violencia exercida contra as mulleres.</p> <p>Desde unha perspectiva de dereitos humanos e de igualdade efectiva entre mulleres e homes, diferentes organismos nacionais e internacionais manifestan a necesidade de impulsar políticas públicas dirixidas á prevención da explotación sexual, á protección das persoas en situación de prostitución e á actuación sobre os factores estruturais que favorecen a súa persistencia.</p> <p>A futura ordenanza persegue promover a erradicación da prostitución e doutras formas de explotación sexual no municipio de Vigo co obxectivo de protexer os dereitos das vítimas do sistema prostitucional, sen prexuízo das competencias estatais e autonómicas na materia.</p> <p>Consideraranse vítimas todas as mulleres en situación de prostitución, orientando a intervención municipal á defensa dos seus dereitos e á súa protección integral. A futura ordenanza situará a demanda como</p> |
|-----------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|



|                                             |                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                            |
|---------------------------------------------|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
|                                             | <p>un dos factores determinantes da existencia da prostitución e establecerá medidas que transcendan o ámbito sancionador, incorporando un enfoque integral e inclusivo que garanta a defensa e a protección de todas as mulleres en situación de prostitución.</p> <p>Establecerase un sistema sancionador identificando as condutas susceptibles de infracción administrativa, como son a demanda, o favorecemento, a promoción ou a facilitación da prostitución e doutras formas de explotación sexual.</p>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                            |
| Necesidade e oportunidade da súa aprobación | <p>As entidades locais desempeñan un papel fundamental na promoción da igualdade entre mulleres e homes, na prevención da violencia de xénero e na protección dos dereitos humanos no ámbito da convivencia cidadá.</p> <p>Os municipios, no exercicio das súas competencias en materia de convivencia cidadá, igualdade, servizos sociais, seguridade e uso do espazo público, poden adoptar medidas destinadas a:</p> <ul style="list-style-type: none"><li>• Previr situacións de explotación sexual</li><li>• Protexer ás persoas en situación de vulnerabilidade</li><li>• Promover políticas de sensibilización e concienciación social</li><li>• Actuar fronte ás dinámicas que favorecen a mercantilización do corpo das mulleres</li></ul> <p>Neste contexto, a futura ordenanza ten por finalidade contribuír, desde o ámbito municipal, á promoción dunha sociedade máis igualitaria e libre de violencia contra as mulleres, mediante a adopción de medidas orientadas á prevención da explotación sexual, á sensibilización social e á protección das persoas en situación de prostitución.</p> <p>Considérase necesario dotar o Concello de Vigo dunha ordenanza que estableza un marco estable de actuación municipal fronte á prostitución e contra todo tipo de explotación sexual, dentro do ámbito das competencias propias da entidade local e sen prexuízo das que correspondan a outras administracións públicas, permitindo desenvolver de maneira coordinada as actuacións municipais nesta materia e reforzar as políticas públicas de igualdade entre mulleres e homes, prevención da explotación sexual, sensibilización social, protección das vítimas e colaboración interadministrativa.</p> |





CONCELLO DE VIGO  
Secretaría de Goberno Local

|                     |                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                  |
|---------------------|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| Obxectivos da norma | <p>A futura ordenanza terá como obxectivos principais:</p> <ul style="list-style-type: none"><li>• Promover a erradicación da prostitución e outras formas de explotación sexual no municipio de Vigo e protexer os dereitos das mulleres vítimas do sistema prostitucional.</li><li>• Concienciar a sociedade de que a prostitución é unha das formas máis extremas de violencia machista, que constitúe unha violación dos dereitos humanos das mulleres e que é expresión da desigualdade existente entre mulleres e homes.</li><li>• Impulsar políticas públicas municipais dirixidas á abolición do sistema prostitucional, aprobando, ademais, un <i>Plan Municipal contra a Trata e a Explotación Sexual e pola Abolición da Prostitución</i> que desenvolva as medidas e actuacións recollidas nesta ordenanza.</li><li>• Promover a colaboración e a participación das entidades, asociacións e organizacións que, desde a sociedade civil, actúan para a abolición da prostitución.</li><li>• Fomentar a especialización das e dos profesionais municipais que interveñen no proceso de información e atención ás mulleres.</li><li>• Articular medidas encamiñadas á reparación integral das mulleres prostituídas e superviventes da prostitución ou doutras formas de explotación sexual.</li><li>• Coordinar os recursos e instrumentos municipais para asegurar a sanción adecuada a quen participa directa ou indirectamente na explotación sexual das mulleres.</li><li>• Establecer un réxime sancionador identificando as condutas susceptibles de infracción administrativa, e as sancións correspondentes, como son a demanda, o favorecemento, a promoción ou a facilitación da prostitución e doutras formas de explotación sexual, no que, en ningún caso, nin de forma directa nin indirecta poderá ser sancionada a vítima da prostitución ou de calquera outra forma de explotación sexual.</li></ul> |
|---------------------|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|



|                                                                 |                                                                                                                                                                                                                                                                                                                                                                                                                                                                                                                                                                                                                                                 |
|-----------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| Posibles solucións alternativas regulatorias e non regulatorias | <p>Considérase que a consecución dos obxectivos perseguidos require a aprobación dunha disposición de carácter xeral que estableza un marco estable para a actuación municipal nesta materia.</p> <p>As actuacións non regulamentarias desenvolvidas ata o momento, aínda sendo necesarias e complementarias, non resultan suficientes para dotar de seguridade xurídica, coherencia e estabilidade o conxunto das actuacións municipais relacionadas coa prevención da prostitución e da explotación sexual, polo que se considera que a elaboración da ordenanza constitúe o instrumento máis adecuado para alcanzar os fins perseguidos.</p> |
|-----------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|

E para que así conste e produza os seus efectos, emito a presente certificación coa salvedade do artigo 206 do Regulamento de organización, funcionamento e réxime xurídico das entidades locais, de orde do Excmo. Alcalde, en Vigo na data da sinatura dixital.

SGF/xs.

V. e Pr.  
O ALCALDE,  
Abel Caballero Álvarez.

